

欽定天文正義卷七十九

雪占考

雪占考

春秋桓公八年十月雨雪周十月令八月也未可以

雪

周考王六年六月秦雨雪

威烈王四年四月晉大雨雪

漢文帝四年六月大雨雪後三年淮南王長謀反發

覺遷道死

景帝中六年三月雨雪其六月匈奴入上郡取苑馬  
吏卒戰死者二千餘人明年條侯周亞夫下獄死

武帝元狩元年十二月大雨雪民多凍死是歲淮南  
衡山王謀反發覺皆自殺使者行郡國治黨與坐  
死者數萬人 元鼎二年三月雪平地厚五尺是  
歲御史大夫張湯有罪自殺丞相嚴青翟坐與三  
長史謀陷湯青翟自殺三長史皆棄市 三年四  
月雨雪關東十餘郡人相食是歲民不占緡錢有  
告者以半畀之

元帝永光元年三月雨雪 建昭二年十二月齊楚  
地大雪深五尺是歲京房張博為石顯所譖死

四年二月雨雪燕多死是日皇后親蠶疾風自西  
北大寒雨雪壞敗其功

成帝陽朔四年四月雨雪燕雀死

王莽天鳳三年二月大雨雪關東尤甚深者一丈竹  
柏皆枯

晉武帝太康五年九月南安大雪折木

惠帝光熙元年閏八月霰雪劉向曰盛陽雨水湯熱  
陰氣脅之則轉而為雹盛陰雨雪凝滯陽氣薄之  
則散而為霰今雪非其時此聽不聰之應

明帝太寧三年三月丁丑雨雪

成帝咸和九年八月成都大雪是歲李雄死

康帝建元元年八月大雪時政在將相陰氣盛也劉  
向曰凡雨陰也雪又雨之陰也出非其時迫近象  
也

穆帝永和三年八月冀方大雪人馬多凍死 十年

五月涼州雪明年張祚護軍張瓘廢祚更立元靚  
京房易傳曰夏雪戒臣為亂

安帝義熙五年三月己亥雪數尺

梁武帝普通三年三月大雪平地三尺雨陰也雪又  
陰妄不妄臣不臣之應時義州刺史文僧朗以州  
叛於魏臣不臣之應也 大同三年七月青州雪  
害苗稼時交州刺史李賁舉兵反僭號擊之不克  
十年十二月大雪平地二尺

東魏靜帝興和二年五月大雪時神武作宰發卒十  
餘萬築鄴城百姓怨忿 武定四年二月大雪人  
畜凍死相望於道時步落稽舉兵反寇亂數州人  
多死亡又爾朱文暢等謀害神武事泄伏誅黨與

伏誅多濫死

後齊武成帝河清二年二月大雪連月南北千餘里平地數尺繁霜盡下時突厥可汗與周師入并州殺掠吏人不可勝紀

後主天統二年大雪三年正月又大雪平地二尺

武平三年正月又大雪時馮淑妃陸令萱內制朝政陰氣積盛故天變屢見

唐高宗顯慶四年二月壬子大雨雪方春少陽用事而寒氣脅之古占以為人君刑法暴濫之象近常

寒也 咸亨元年十月癸酉大雪平地三尺人多

凍死

武后久視元年三月大雪

明皇開元二十九年九月丁卯大雨雪大木偃折

德宗貞元元年正月丙午大風雪寒民饑多凍死者

十二年十二月大雪甚寒竹柏柿樹多死占曰

有德遭險厥災暴寒 十九年三月大雪 二十

年二月庚戌始雷大雨雹震電大雨雪既雷則不

當雪陰脅陽也

憲宗元和十二年九月己丑雨雪人有凍死者  
十五年八月己卯同州雨雪害稼

文宗大和六年正月雨雪踰月寒甚

武宗會昌三年春寒大雪江左尤甚民有凍死者

懿宗咸通五年冬隰石汾等州大雨雪平地深五尺

昭宗景福二年二月辛巳曹州大雪平地二尺天

復三年三月浙西大雪平地三尺餘其氣如煙其

味苦十二月又大雪江海冰天祐元年九月壬

戌朔大風寒如仲冬浙東浙西大雪吳越地氣常

燠而積雪近常寒也

宋太祖建隆三年春延寧二州雪盈尺溝洫復冰草

木不華丹州雪二尺許

太宗雍熙七年冬南康軍大雨雪江水冰勝重載

端拱元年閏五月鄆州風雪傷麥淳化三年九

月京兆府大雪殺苗稼四年商州大雪民多凍

死

真宗咸平四年三月丁丑京師及近畿諸州風雪損

桑天禧元年十二月京師大雪苦寒人多凍死

路有僵尸遣中使瑾之四郊 二年正月永州大雪六晝夜方止江溪魚皆凍死

仁宗至和元年正月京師大雪貧弱之民凍死者甚衆 嘉祐四年正月自冬雨雪泥塗盡冰都民饑寒死於道路者甚衆

英宗治平四年冬無雪

神宗元豐八年冬無雪

哲宗元祐元年冬無雪 二年冬京師大雪連月至春不止久陰常寒罷上元節游幸降德音諸道

四年冬無雪 五年冬無冰雪 八年十一月京

師大雪多流民 元符二年正月甲辰朔御大慶

殿受朝賀以雪罷

徽宗政和三年十一月大雨雪連十餘日不止平地八尺餘冰滑人馬不能行詔許百官乘輜入朝飛鳥多死 七年十二月大雪詔收養內外乞丐老幼

欽宗靖康元年閏十一月大雪盈三尺不止天地晦冥或雪未下時陰雲中有雪絲數寸墮地 二年

正月丁酉大雪大寒甚地冰如鏡行者不能定立  
是月乙卯車駕在青城大雪數尺人多死

高宗紹興元年二月寒食日雪 十三年三月雪

二十八年三月雨雪 三十一年正月戊子大雨

雪至己亥逾旬不止禁旅壘舍有壓者時又雪寒  
甚冬無雪

孝宗乾道三年冬溫少雪無冰 五年冬溫無雪

六年冬溫無雪無冰 淳熙十二年十二月大雪  
至明年正月或雪或霰或雨冰或冰沍尺餘連日

不解台州雪深丈餘民凍死 十六年四月戊子

成州天水縣大雨雪麥皆凍死

光宗紹熙二年正月行都大雪積沍河冰厚尺餘寒  
甚是春雷雪相繼凍雨彌月

寧宗慶元元年冬無雪 四年冬無雪 六年冬燠

無雪桃李華蟄蟲不藏管子曰臣乘君威則陰侵  
陽盛冬不冰時韓侂冑擅朝陰脅陽之衆 開禧

三年冬少雪 嘉定九年冬無雪 十三年冬無

冰臘無雪